

HEADLINES (EVENING)

1. Art & Culture Minister Pu C. Lalsawivunga'n Zo hnaathlak peng hrang hrangte chu chenna hmun dang mahse unauna erawh a ngai reng tih sawiin then hran theih an nilo tih a sawi.
2. Tunhnaiah ruah tam tham tak bakah thli thawk thei anih avangin India Metereological Department, Aizawl chuan mipuite fimkhur turin a hriattir.
3. President Droupadi Murmu-i chuan India in mahni intodelh leh ram chak ni tura hmathlir a neih chu a khua leh tuite an hrisel that phawt loh chuan tihhlawhtlin theih a ni lo a ti
4. Sawrkar laipui chuan dan phalloha pawisa khelhna leh inchawina website leh application 300 chuang a block.

<><><>

THANGRAM CULTURAL MEET

Art & Culture Minister Pu C. Lalsawivunga'n Zo hnaathlak peng hrang hrangte chu chenna hmun dang mahse unauna erawh a ngai reng tih sawiin then hran theih an nilo tih a sawi.

Minister hian khan Ronpur, Assam-a Thangram Cultural Meet-2026 Thangram Indigenous People Movement leh Mizo Zirlai Pawl te'n an buatsaih chu nizan khan a hmanpui a, Zo hnaathlak peng hrang hrangte chu chenna hmun dang mahse inunauna erawh a ngai reng tih sawiin then hran theih annilo a ti a, Mahni awmna hmunah India khua leh tui tha ni tur leh midangte tana hnawklo tura khawsak tum tura chahin boruak muanawm tak hnuaia hun an hmang thei chu lawmawm atih thu a sawi bawk.

Minister chuan Thangram Cultural meet chuan Thangram chhehvela cheng Zofate inlungualna tha leh zual thlen se a duh thu sawiin, Mizo hnam ziarang vawng nung zel chungin Zonun zemawi tlawmngaihna, aia upate zahna, hawihhawmna chhawm zel tur leh Mizo an nihna inhrereng chung a mawi taka khawsa turin kalkhawmte a chah a ni.

Adviser to CM Pu Lalmuanpuia Punte pawhin thusawiin insuihkhawm lehna tura ram hruaitu, tlawmngaipawl hrang hrang kaltlanga hmalakna-ah hmasawmna hmuh ani tih sawiin engtik hunah emaw ram khatah inlungual takin an la khawsa ho dawn tih a sawi bawk.

Thangram Cultural Meet hmanna hi Ronpur Assam-ah neih a ni a, Kum 2021 khan Cultural Meet hi lo neih a ni tawh bawk. Helai chhehvelah hian Chorei, Sakachep, Hrangkhawl, Ranglong, Molsom leh Kaipeng te an cheng a ni.

<><><>

AMC ELECTION DATA

Aizawl Municipal Corporation huam chhunga ward number 18-na chu AMC inthlan lo awm tur atana voter tamna ber ward niin, voter 18,906 an awm.

Mizoram State Election Commission chhinchhiah danin, AMC ward number 18 na ah hian vote thlak thei hmeichhia 18,906 bakah mipa voter 10,209 an awm a, ward number 18 na hian Tuikhuahtlang, Mission Veng, Model Veng, Salem Veng, Dam Veng, Venghnuai, Thakthing bakah ITI Veng-te a huam a ni. AMC ward chhunga voter tamna ber, Ward number 18-na ah hian a veng mal angin ITI Vengah voter an tam ber a, mipa 2249 leh hmeichhia 2505, a vai a belhkhawmin voter 4754 ITI Vengah hian an awm a ni.

AMC Ward chhunga voter tlemna ber ward chu ward number 8-na a ni a, AMC Ward number 8-na hian Armed Veng, Armed Veng South leh Chite veng te a huam a, ward number 8-na ah hian voter hmeichhia 3670, mipa 4305, a vai a belhkawmin 7975 an awm a ni.

Aizawl Municipal Corporation inthlan lo awm tur atana hmeichhiate tan a candidate nih hauha bik bialah ward number 2-na ah voter an tam ber a, Ward no 2-na hian Chaltlang, Chaltlang Lily Veng, Bawngkawn, Bawngkawn South leh Bawngkawn West-te a huam a, voter hmeichhia 9223, mipa 7654, a vai a belhkhawmin 16,877 an awm a ni.

Aizawl Municipal Corporation huam chhungah hian hian a veng bil ang a voter tamna ber chu ward number 2-na huam chhunga Bawngkawn Veng a ni a, Bawngkawn Vengah hian voter hmeichhia 3461, mipa 2981, a vai a belhkhawmin 6442 an awm a ni.

<><><>

WEATHER

Tunhnaiah ruah tam tham tak bakah thli thawk thei anih avangin India Metereological Department, Aizawl chuan mipuite fimkhur turin a hriattir.

Akashvani News Aizawl zawhna chhangin India Metereological Department, Aizawl Director Pu Sudhir Kumar Dwivedi chuan Mizoram District hrang hrangah ruah tam tham tak bakah thli na tak tleh thei anih avangin mipuite fimkhur a tul thu a sawi a, chhuak tam lo tur leh thingkung bul hnaiah awm tam lo tura chah in leimin thei lakah fimkhur turin a chah a ni.

Vawiina ruah tam tham tak sur avang hian thlawhna pawh cancel nual a ni a, Lengpui Airport hotute sawi danin Mizoram pan thlawhna 3 cancel ani tih sawiin heng hi Delhi thlawhna 2 leh Kolkata thlawhna 2 anih thu an sawi a ni.

<><><>

MZERC PUBLIC HEARING

Power & Electricity Department-in kum 2026-27 atana eng chhit man (Electricity tariff) a rawtna chungchangah Mizoram Electricity Regulatory Commission (MZERC) chuan vawin khan Public Hearing a buatsaih.

Public Hearing hi MZERC Chairperson, Pu Benjamin L.Tlumtea kaihhruaina-in Aijal Club-ah neih a ni a. Hun bituk chhunga mipuite'n rawtna leh sawiselna thu an thlente leh P&E department-in an chhannate ngaihthlak a ni.

Kum kal mek 2025-2026 leh kum hmasa 2024-25 ah te khan eng chhit man hi tihsan a ni lo a, tuna P&E department-in rawtna a thehluhah pawh hian eng chhit man tihsan rawtna a awm lova, mipui atanga Revenue sum mamawh zat (ARR) a hmuh tlin lohna chu Sawrkarin subsidy-in a peksak dawn a ni. MZERC chuan ngun taka a zir chian hnu-ah kum thar FY 2026-27 atana Sawrkar pek tur subsidy leh eng chhit man tur zat hi a bithliah dawn a ni.

Multi-Year Tariff Regulations, 2014-in a phut angin P&E department hian kum tinin mipui hnena power supply enkawl nana sum leh pai a mamawh (Aggregate Revenue Requirement) leh, eng chhit man bithliah chungchanga rawtna a neihte chu Commission hnenah a theh lut thin a. A rawtna hi chanchinbu-ah chhuahin mipui vantlang tan sawiselna hun emaw, thurawn pekna hun emaw hawn thin a ni a. Sawiselna emaw, thurawn emaw pe duhte chuan MZERC hnenah ziakin (Affidavit hmangin) an thehlut thin a ni.

<><><>

LUNGLEI ASF

Lunglei District-ah ASF vanga vawk suat 3,443 zangnadawmna cheng nuai 214.92 pek chhuah a ni.

Animal Husbandry & Veterinary Department, Lunglei District chuan kum 2024 chhunga vawk pul hri, African Swine Fever avanga vawk suat 3,443 te zangnadawmna cheng nuai 214.92 chu Kumin March ni 6 atanga ni 20 chhung khan a tuartu chhungkaw 623 te hnenah an pe chhuak a.

He zangnadawmna hi ASCAD (Assistance to States for Control of Animal Diseases) hnuai atang leh State share atanga pek chhuah a ni a. A dawngtute bank account-ah Direct Benefit Transfer-a thun a ni.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni. Naktuk zing dar 7 leh a chanve-ah Chanchinthar puan leh a ni ang.

<><><>

SWAP & SAVE

UD&PA Department buatsaih zirlaibu, uniform leh zirlai kaihhnawih bungraw inthleng tawna Swap & Save chu Mizoram chhunga District hrang hrangah hlawk taka hman a ni.

Aizawl ah chuan Swap and Save Campaign hi March 9 khan kalpui tan niin naktuk March 21 hman tur a ni dawn a, Nikum khan Swap and Save Campaign hi Aizawl veng 7 leh district headquarters tinah neih niin mipuiin an hlut hle a, nikuma campaign neih chhunga bungraw lut zawng zawng chu 20,386 niin chhuak zat chu 12,596 a ni.

Kumin hian Centre hi Aizawl khawpuia veng 8 ah leh District headquarters tinah hawn a ni. Heng Centre ah hian zirlai naupang session thar kai mai turten an zirlaibu hman tawh loh, uniform hak tawh loh leh zirlai kaihhnawih chu a mamawh te tan pe in a hmang tangkai tur ten an hman nawn ve leh theih nana awlsam zawk leh a thlawna an lak theihna tura duan a ni a, Heng centre te hi Aizawl ah chuan Govt Multi-utility Centre Thakthing, AMC Plaza Bawngkawn, Sanitation Site Office Tuikual, Dawrpui Middle School, Local Council House Vaivakawn, Durtlang North, ITI leh Community Hall Armed Veng South ah awmin naktuk thleng hawn a ni ang.

Lawngtlai ah chuan DC Office tual-ah Swap & Save hi Lawngtlai SDO (Sadar), Pi Margareth J. Vanlalremmawii'n a hawng a. Sorkar laipui ruahman-a ram puma faina beihpui thlak thawh hnihna Swachh Bharat Mission (Urban) 2.0 hnuaiah Triple R ti-a hriat Reduce, Reuse, Recycle chu UD&PA Lawngtlai pawhin theihtawpin an kalpui thu a sawi. Lawngtlai a Swap & Save kalpuiah hian zirlaibu leh uniform te, thawhnaw leh thil dang tha tak tak thekhawm niin, hengte hi a mamawh apiangina thlawnin an la a, naktukah chhunzawm leh tur a ni.

<><><>

PRESIDENT

President Droupadi Murmu-i chuan vawiin khan Vrindavan-a Ramakrishna Mission Sevashrama Hospital-a Nand Kishor Somani Oncology Block a hawng. Thusawiin Pi Murmu-i chuan India in mahni intodelh leh ram chak ni tura hmahlir a neih chu a khua leh tuite an hrisel that phawt loh chuan tihhlawhtlin theih a ni lo a ti a. Sawrkarin ramchhunga damdawiin leh hriselna lama hmasawna ruhrel te tichangtlung turin chawl loin hma a lak thu sawiin khua leh tui zawng zawngin damlo enkawlna tha pek vek a tum tih a sawi a. Sawrkar laipui flagship programme Ayushman Bharat hmangin mipui maktaduai chuangte tan damlo enkawlna man tlawm leh tha a pe reng a ni a ti bawk.

<><><>

ONLINE

Sawrkar laipui chuan dan phalloha pawisa khelhna leh inchawina website leh application 300 chuang a block. Union Ministry of Electronics and Information chuan ramchhunga dankalha online game khelhna thinte dapchhuah hna thawkin heng website leh apps te hi a block sak a. An block zingah hian infiamna hrang hrang online-a inchawina, online casino leh hetiang kaihhnawih hrang hrangte hi a khap a. Thudawn danin website 8400 chuang vawiin thlengin block tawh a ni a. A tam zawk hi Online Gaming Act hmangin paihtir vek an ni tawh bawk a ni.

<><><>